

四庫全書

子部

欽定四庫全書

子部

續名醫類案卷三十四至
六

詳校官太醫院恩糧_臣孔毓秀

編修_臣倉聖脈覆勘

總校官編修_臣王燕緒

校對官中書_臣劉源溥

謄錄監生_臣陳箴

欽定四庫全書

續名醫類案卷三十四

錢塘魏之琇撰

產難

薛立齋云荆婦孟冬分娩艱難勞傷元氣產子已死用
油紙燃燒斷臍帶藉其氣以暖之俄頃忽作聲此兒
後無傷食作瀉之症可見前法之功不誣世用刀斷
臍帶子母致危者竟不知其由矣且穩婆又喜平日

常施小惠得其用心兼以安懷慰母懷故無虞耳一
穩婆云我止有一女正分娩時適當巡街御史行牌
取我視其室分娩女因驚嚇未產而死后見御史更
以威顏分付迨視產母胎難順而頭偏在一邊若以
手入推正可保順生周畏其威不敢施手但回稟云
此是天生天化非人力所能立俟其母子俱死

張子和治一婦人年二十餘臨產召穩婆三人其二嫗
極拽婦之臂其一嫗頭抵婦之腹更以兩手扳其腰

極力為之胎死於腹良久乃下兒亦如血乃穩媼殺之也豈知瓜熟自落何必如此乎其婦因之經脉斷閉腹如刀刺大渴不止小便閼絕主病者禁水不與飲口舌枯燥牙齒黧黑臭不可聞飲食不下昏憤欲死張先以冰雪水恣意飲之約二升許病緩渴止近時尚科及庸手遇產后一以燥熱溫補為事殺人如麻閱此宜稍知變通矣次以舟車丸通經散前后五六服下數十行食大進仍以桂苓甘露飲六一散柴胡飲子等調之半月獲安

一婦人臨產召村嫗數人侍焉先產一臂出嫗不測輕重拽之臂為之斷于死腹中其母面青聲冷汗漿漿不絕時微喘張曰命在須臾針藥無極以壯繩以膏塗其鈎令其母分兩足向外偃坐左右各一人脚上立足次以鈎其死胎命一壯力婦倒身拽出死胎下敗血五七升其母昏困不省待少頃以冰水灌之漸醒二日大醒食進次日四物湯調理數日方愈張常曰產后無他事因侍嫗非其人轉為害耳

凌漢章治吳江婦臨產胎不下者三日呼號求死凌針刺其心針出兒應手下主人大喜問故曰此抱心生也手針痛則舒取兒掌視之有針痕

明史

按此二案與宋史龐安時一案彷彿大抵醫既有名人益附會如近時吳門有享盛名者里人時向余道其神驗皆古人案中所載若以蟹治漆毒以土坑治香氣不一而足所謂俗語不實流為丹青者是也

函齋治前太僕卿張君季媳年輕體壯孕必八個月而
生產必數日百苦而下兒生必週而天再孕再產再
天皆同乃謂后當生宜相聞明年又八個月坐草三
日不下忽憶前言飛輿相召中途逢驅車者云迎其
父母作永決計比至已夜分矣診之脈未離經人餘
殘喘穩婆在旁問之曰兒頭已抵產門不得出耳乃
急令安卧且戒勿擾與安胎藥明晨主人出笑而不
言問之曰好矣曰昨言兒頭已抵產門今若何曰不

見了大笑而別后過百二十日計十二足月生男今
八歲矣始知前此皆生生取出以體壯年輕幸保母

命耳 達生編

太學戴時濟弟媳一產三男母子俱殞一猶在腹今又
婢孕其腹膨脹頗患之比產先令安卧與加味川芎
湯每隔半日而產積日半生三子俱無恙 全上

陳氏婦產九日夜不下一息僅存聞有兔腦丸踵門求
藥問之亦曰頭逼產門不得出諭令安卧再來取藥

強而后去斷與芎歸湯明日生下母子兩全按此皆產母用力逼令橫在腹中豈有人倒懸十日而尚得

生者乎

全上

一婦產兒手出不得入穩婆礪刀以須急令安卧與大劑芎歸湯徐徐托之手入明早生下母子兩全右臂

紫黑數月而后消

全上

孫文垣治姪元素內人難產夜半叩門起問何狀曰產已及門不能下用力則胸膈間有物上衝痛不可忍

思頃之曰此必雙胎胞以分為一上一下也及戶者
在下欲出在上者以用力而上衝故胸膈痛也勢亦
險矣治法必安上而下者乃可用力以產也即取益
元散一兩與之令以紫蘇湯送下藥甫進胸膈痛止
不逾時產二女母亦無恙或問曰益元散非產科急
劑何能取效如是曰紫蘇安胎下氣滑石滑以利氣亦
催生上品蓋醫者意也茲亦以意裁取之耳此法方
書無載記之以備采用

妊婦案中治竹匠
婦常以此方安胎

馮楚瞻之媳向患吐血下熱之症自受妊以來八味丸

加牛膝五味日服勿間

此其孫所以百日內生癰症之由也案見小兒胎毒門

及臨盆胞水已下而數未產脈之洪數而帶堅象此陰道枯槁已極何能流通生育乎投以補養氣血催生以藥脈候如故知為羣藥攻力不專乃單以熟地三兩濃煎日進三次脈始洪緩而軟但坐蓐數日子母俱困胎氣毫無運動下達之意象疑胎死矣再與人參五錢煎湯一鐘細刮肉桂之最佳者錢許調服

之連進三劑乃生

一婦難產五日后精神已竭六脈沉微慄慄一息腹中
毫不覺動下部腫極知母子俱困何能健運以出乃
與參芪歸芍姜桂白朮牛膝溫煖調補氣血之劑下
咽少頃腹中運動疼痛而產母子俱活

欽有神醫常路遇舁櫬者櫬中血流出醫曰此尚活可
治也開視則彌月婦人顏色未改以針針其心遂產
一男手有針孔母子俱無恙其子至今尚存

張氏
庖言

張所望治婦人產一子忽叫痛欲絕舉家驚愕莫措所望診之曰腹內尚存一子未下投一丹而子下母遂

甦

錢塘縣志

張丈仲治一婦一橫產先出手諸般符藥不捷乃以艾灸其婦人右腳小指頭尖頭三壯炷如小麥大下火

立產

醫說

高道者不知何許人也得長桑君禁方當明初挾技遊銀陽一日值柩于途諮之乃孕婦喪也道者驗其遺

衣血曰此猶未死耳啟棺視之一針遂甦俗驚道者
能起死人以此秦越人云

江西
通志

陸祖愚治高濟亭室胎前惡阻或以清涼調治既而內
傷飲食消導太過元氣甚弱胎動欲產臨盆三日夜
方得分娩疲憊昏冒不知人事診之遍身冷汗口鼻
之氣有出無入寸關無脈兩尺如絲不及服藥令壯
盛婦女對口接其出入之氣俟其氣之入而呵之次
用人參歸身熟地各一兩熟附四錢煎服加童便一

酒盃徐徐灌下四肢溫和人事清爽連三劑便能飲食此時若不先用接氣之法必俟藥熟不幾氣絕耶萬密齋治朱宅一婦女李氏常苦難產形頗壯性急少食此氣滯也與一方枳殼甘草香附為主當歸川芎白朮陳皮佐之至八九個月內每月服三帖后生子甚快

葉杏林治一婦人分娩甚易至四十外下血去多玉門不開與加味川芎湯一劑更以活水無憂散斤許煎

熟時時飲之以助其血而產

產婦坐草時取路傍舊草鞋一隻用鼻絡小耳繩燒灰溫

酒調服如得左足者男右足者女覆者兒死側者有

驚自然理也似非切要之藥催生極驗

得效方

王執中云貴人內子產后暴卒急呼其母為辦后事母

至為灸會陰及三陰交各數壯而蘇母蓋名醫女也

資生經

余素不信陰陽家言因召工俸屋或謂年月不利不聽

時荆婦娠身已九月及產一穩婆甚青年見勢不順
乃託故亟歸易其姑至視之曰此非可望生下欲全
母命非嚮而出不可余亟令安卧勿怖以熱地四兩
杞子二兩當歸一兩煎百餘沸先飲一鐘再煎再飲
不及時許一女已死乃臍帶綰於項間所致幸母無
恙穩婆詫異而去婦人良方云凡有孕婦之家不宜
造次修治良有以也

凌表姪婦年二十餘暑月臨蓐自旦及暮不得產體素

弱屢發暈迷悶時師診之以為挾痧不可服參漸危
急延余視無他乃腎氣不能作強肝虛不能疎洩又
血液枯涸致胎不易下耳與熟地二兩杞子一兩當
歸五錢曰服下即產矣已而果然次日覺惡露行少
飲沙糖老薑湯血行甚涌希科以炮薑白朮棗仁茯
神當歸白芍等不效反加自汗口苦小便熱瀉煩躁
不眠再延診曰但以余前方加棗仁當歸愈矣一劑
而安余此方催生則用當歸止崩則用棗仁甚者杞

地俱倍之凡治百餘婦人無不神驗無力之家可代
人參且無后患古今諸方無出其右者

產後胞衣
不下

薛立齋治一產婦胞衣不下胸腹脹痛手不敢近用滾
酒下失笑散一劑惡露胞衣並下

一產婦胞衣不下腹作痛手按痛稍減此氣虛而不能
送出戶也用無憂散而下前症常詢諸穩婆云宜服
益母草丸或就以產婦頭髮入口作嘔胎衣自出其

胎衣不下者必死授與前法甚效

呂東莊治陳氏婦半產胎衣不下連服行血催衣之藥
四劑點血不行胸痛脅亂呂視之曰此脾失職也先
與黃芪一兩當歸一兩下咽而脅亂頓減時有以準
繩女科中惡血阻不下及胞衣不下方書一本進者
上注某方經驗某方試效以示曰中有可用否曰一
無可用遂用大劑人參白朮白芍黃芪歸身茯苓甘
草等藥一服而惡露漸至皆驚歎曰古方數十一無

可用準繩一書真可廢也呂曰惡是何言王損菴醫

之海岱也顧讀書者自不察耳若唯以惡阻

惡阻二字豈兩

耶及胞衣不下條中求合吾方宜其謬也試以血崩

及下血條中求之吾方可見矣蓋此病本氣血大虧

而致半產脾失統血之職水湮土崩衝決將至故生

脅亂不為之修築而反加穿鑿是愈虛也吾正憂血

之下不止其不合也又何怪焉曰今從子法可得免

乎曰不能也穿鑿過當所決之水已離故道狂瀾壅

積勢無所歸故必崩急服吾藥第可固其隄使不致
蕩沒耳至第三日診尺內動甚曰今夜子時以前必
崩矣因留方戒之曰血至即服至黃昏果發如言得
無恙方即補中益氣加參芪各二兩也次用調補脾
腎之藥而愈

胞衣二字
却不重醒

薛立齋治一婦產后面赤五心煩熱敗血入胞胞衣不
下有冷汗思但去其敗血其衣自下遂用黑豆二合
炒透然後燒紅鐵秤錘同豆淬酒將豆淋酒化下益

母二九胞衣從血而出餘症盡平

陳良甫云有一親戚婦人產後胞衣不下血脹迷悶不
記人事告之曰死矣僕曰某收得趙大觀文局中真
花蕊石散在笥中漫以一帖贈之以童便灌之藥下
即甦胞衣與惡物旋即隨下乘興無恙

良方

施介縣室人年三十餘忽有孕又孿生產后頗健能食
雞啖飯數日來漸發熱脹懣診之脈浮按滑疾沉按
結轉詢至惡露已一日不行謂為瘀也宜通之乃可

與生地牛膝益母紅花桃仁泥當歸尾丹參瓦楞子
畏不敢服延專科曰此年過壯而初產育氣血俱傷
屬虛也與焦朮炮薑歸芍茯神棗仁等一劑熱益甚
再劑遂譫讖更一專科其說同其藥仿又二劑日夜
不眠昏狂不省人事時忽高聲歌唱與傷寒陽明失
下無異再延診曰產數日惡露即停雖執途人而語
之亦必知為瘀滯若欲其生亟進前方可耳不得已
乃服黃昏進藥至夜分惡露始行黎明復下一物已

焦黑乃胞衣也蓋產時穩婆只收其一謂二人同胞不知其一猶在腹也遂貽患乃耳胞去血行其病如失然予初亦不知謂為胞未下也醫誠難哉

產後

隱疾即脫陰

薛立齋治一產婦陰脫便閉下墜形氣倦甚用十全大補湯而上因怒仍脫重墜寒熱小便淋瀝用補中益氣湯加山梔龍膽草一劑重墜減而小便利仍用前湯去二味倍加升麻參芪而愈

一產婦陰脫腫痛小便淋漓此因元氣甚虛而肝火旺
也用補中益氣湯加山梔車前子四劑而肝症悉退
仍用前藥去二味加茯苓小便利又用十全大補湯
而腫痛遂漸消

一產婦元氣充實初產玉門不閉腫嫩作痛小便不利
薛謂肝經濕熱壅滯欲以加味逍遙散加車前子牛
膝治之不信乃服十全大補湯腫痛益甚仍用前藥
更加澤瀉一劑而安

一產婦陰脫腫痛脈又滑數欲作膿也薛用十全大補湯四劑膿成又數劑而膿潰但小便頻數而患處重墜痛盛此因元氣虛弱而下陷也又用補中益氣湯數劑而愈

一產婦素有肝火患陰蝕疳瘡內潰痒痛如蟲行狀食少熱渴小水淋瀝用加味逍遙散加味歸脾湯兼服間以蘆薈丸外以鶴虱草煎洗而愈

龍葵子才治一產婦陰門痛極不可忍教用桃仁去皮尖

研如泥塗之即已

散其瘀也

一婦產后陰戶極痒令其食

鹽一兩塗之即瘳

去風熱也

一婦產后腫大用吳茱萸煎

湯洗立愈

辛以散之也

薛立齋治一婦胞衣不下努力太過致子宮脫出如猪

肚狀令用溫湯浴之即以手捺子宮去其惡露仰卧

徐徐即入而安

一婦人脫肛用補中益氣加味歸脾各百餘劑而愈後

因分娩復脫仍以前藥各二百餘劑始愈

拙哉

李時珍治一婦產后子腸不收用草麻仁搗膏貼其丹田一夜而上但用此膏病愈即宜揭去其提拔之力最猛也又有用催生下胎用塗脚底亦宜即時洗去孫文垣治一僕婦因產難子宮墜出戶外半月不收艱于坐卧有醫令服補中益氣百帖需參二斤可愈乃聽之孫謂此必產時受寒血凝滯不能收斂雖名陰脫未必盡由氣虛下陷也觀其善飯大小便如常可知矣授以一法價廉功省三五日可愈用未經水石

灰幹一塊重二三斤者又以韭菜二三斤煎湯置盆中將幹灰投入灰開湯沸俟沸聲盡乃瀘去灰乘熱坐盆上先熏后洗即以熱韭于患處揉擲蓋石灰能散寒消瘀韭菜亦行氣消瘀一日洗一次三日果消軟收入

按子宮子腸有墜下損傷者有終身不能上如帶緩者要皆初時治之不得其法耳

產後

瘀滯

南濠陳鰲妻新產五六日患腹痛惡寒發熱醫曰此元氣大虛正合丹溪云產后當大補氣血遂用人參大劑入口痛劇面黑發喘而死殊不知丹溪以產後當以大補氣血為主治雖襍症以末治之今陳氏之妻因瘀血未盡而惡寒發熱不先去其瘀血驟施大補是失丹溪主末二字之意矣主末者即標本之謂也

續醫說

吳孚先治楊氏婦產后一月半身以下忽腫脹臍突小

便不通或以五皮飲加車前牛膝治之不效吳曰先

經斷而后腫脹名曰血分

分平聲

且按少腹有塊如拳

知敗血尚結于胞門非溫無以化之以薑桂佐行瘀之劑下血如黑漆數升便利腫消

孫文垣治溫氏婦產后五十餘日右脇脹痛手不可近

非虛痛

可知

赤白帶下多如膿發熱便秘診之曰此惡露

未盡血化為膿宜急治之也常見數婦病此治不善積久為毒有成腸癰者有內成毒從腰俞出者皆瘀

血為患也急用澤蘭葉山查五靈脂消惡露為君川芎當歸茯苓白芷為臣益母為佐香附青皮為使外與當歸龍薈丸潤大便秘從之去服后次日腹脇皆寬痛亦止又食葷與雞子復作痛但不如前之盛與保和丸用山查煎湯送下三錢遂愈

潘印川子室年二十五因難產傷力繼以生女拂意后又女死悲戚即時暈厥洎醒神思昧昧手足癱瘓目上視孫至因癰瘕不能胗脈細詢之自產后惡露絕

無時有女醫在旁與人參大嚼及獨參湯并粥襍進
蓋參與粥皆壅膈上故神昏癰癰不已也教以手探
喉中乃隨手吐出痰飲粥食盈盆癰癰方定以川芎
山查澤蘭葉陳皮半夏茯苓香附進之稍得睡不虞
女醫又私與補藥子丑時陡然狂亂人皆異之目為
神附禱禳無已曰此惡露不盡乃畜血如見鬼之症
非真有神物相附也
此時何不明
言女醫之失徐以正言叱之即
緘默斷繼以清魂散加滑石童便與之天明小便乃

行狂亂皆定既而女醫欲要功又以藥進則狂亂如
前再與川芎一錢五分當歸四錢澤蘭益母各一錢
臨服加童便連進二帖不效此必胸中有痰作滯故
藥力不行即用前劑大加山查惡露一行神思即靜
睡片時手足微動或以掌批其面或以手槌其胸昏
亂不息診其脈近虛早間面紅而光申酉時面色白
此血行火退當補矣與人參川芎澤蘭各一錢當歸
山查各二錢茯苓陳皮各八分卷荷葉一片煎熟調

琥珀末五分服半時許噉氣二聲此清陽升而濁陰降矣自是惡露微行大便亦利飲食漸進而安

細閱是案其得肯綮處全在知惡露未行及誤服人參兩著至其用藥亦只見症治症而已

高鼓峰治一婦人產后惡露不盡至六七日鮮血奔注發熱口渴脇痛狂叫飲食不進或用四物湯調理或用山查青皮延胡黃芩等藥卒無一效脈之洪大而數此惡露未盡留泊血海凡新化之血皆迷失故道

不去畜利痰則以妄為常曷以禦之遂以醋製大黃
一兩生地黃一兩桃仁泥五錢乾漆三錢濃煎飲之
或曰產后大虛藥毋過峻否曰生者自生去者自去
何虛之有第急飲之果熟寐半夜次早下黑血塊數
升諸病如失矣復用補中益氣而安

薛立齋治一產婦患惡露不下服峻懷之劑惡露隨久
而昏憤以手護其腹薛曰此脾氣復傷作痛故用手
護也

虛痛
喜按

以人參理中湯加肉桂二劑補之而愈

按產后惡露不下有二一則瘀滯宜行一則血虛
宜補予常治數人皆二三日而止察其人果虛一
以大劑營而愈

陸肖愚治謝四府如夫人分娩旬餘忽臂下微微作痛
或謂血虛用大料芎歸十劑而痛不減又謂補血當補
氣陽生則陰長加參芪五六劑而痛益劇脈之六部
沉弦而左關尺更緊詢之止左邊近肛門一點痛耳
問痛處熱否曰極熱曰此氣血不足而痛也乃產后

敗血凝滯于肝經腎乃肝經所絡之地治而注之不
急治久必成毒當行血海之瘀滯解經絡之蘊結庶
可消耳不信更醫仍以八物湯投之一日痛處頓腫
又過寒涼解毒之品致瘡口不收大便作泄飲食不
進肌肉半削再診脈微細如蛛絲按之猶覺有神曰
今宜大補矣乃用四君加芪桂附數劑瀉止食進又
加當歸熟地約十劑成痂而愈

一產婦惡露不行瘀塞溺道小便不利遍身浮腫喘急

不得卧用牛膝膏治之愈丹皮大黃當歸桂心桃仁
蒲黃元胡香附瞿麥川芎麝香先用土牛膝三兩水
五碗煎減半入上藥煎大黃

孫文垣治程達庵之媳產半月而腿疼專科曰虛與八

珍湯十日疼益盛疼虛甚熱

非虛可知

謂曰慎勿認虛認

風此產后敗血凝滯血海流于經絡不急治則瘀無
從出久必化膿成毒或為腸癰今腿疼是其候也不
信復延專科曰風也但丹溪云產后當大補氣血雖

有它症從未治投十全大補痛轉劇大發寒熱小腹
近胯紅腫出膿外科又與收口太早腰俞復發一毒
腫痛寒熱如初十日後大潰膿而不收口精神委頓
肌肉陡削飲食不進惡心惡寒奄奄一息診之六脈
需大無力清水無膿曰熱亟矣速為保脾與人參白
朮各五錢甘草乾薑附子各一錢黃芪三錢白芷桂
心各五分外科曰白朮作膿恐不可服曰膿不死人
飲食不進則死人也四帖神氣回飲食進症減膿成

改用參苓白朮散調理一月而安

朱丹溪治一婦人年十八難產七日後產大便泄口渴
氣喘面紅有紫斑小腹脹痛小便不通用牛膝桃仁
當歸木通滑石甘草白朮陳皮茯苓紅花煎湯調益
母膏不減後以杜牛膝煎濃一碗飲之至一更許大
利下血一桶小便通而愈

心法

繆仲淳治莊斂之次女產后惡露未淨至夜發熱脾胃
却弱腰腹大痛時師謂產后氣血俱虛投以人參當

歸諸補劑轉劇咸慮其成毒勞也診之謂不數帖即痊
矣用白芍扁豆杜仲各三錢紅麴蘇子車前各二錢
萸肉麥冬青蒿各四錢橘紅乾葛各錢半炙草八分
牛膝五錢黑豆八錢澤蘭一錢十劑而惡露淨發熱
已腹痛亦止但腰痛未盡除脾胃尚未健改用白芍
山查橘紅麥芽石斛扁豆沙參各三錢砂仁杜仲萸
肉各二錢五味一錢炙甘五分牛膝五錢蓮肉四十
粒十餘劑脾胃亦健而全愈

來天培治王正權室人產后十餘日患寒熱腹痛目赤而濇羞明疼痛診之脈沉而濇詢其惡露未盡知停瘀為患以當歸川芎桃仁紅花甘菊生地丹皮銀花連翹蟬退清火行瘀驅風等劑六帖而痊

薛立齋治一婦產後四肢浮腫寒熱往來蓋因敗血流入經絡滲入四肢氣喘咳嗽胸膈不利口吐酸水兩脇疼痛遂用旋覆花湯微汗漸解頻服小調經散用澤蘭根煎湯調下腫氣漸消

未選入

一產婦腹脹或用抵當湯敗血已下前症益甚小腹重墜似欲去后此脾氣虛而下陷用補中益氣加炮薑溫補脾氣重墜如失又用六君子湯而安歸脾湯調理而愈

全上

產後

癥瘕

薛立齋治一產婦腹中似有一塊或時作痛而轉動按之不通

便非實積

面色痿黃痛則絞白脈浮而濡此肝氣

虛而血弱也不信乃服破血行氣痛益盛轉動無常

又認為血蠶專用破血祛逐之藥痛攻兩脇肚腹尤甚益信為蠶確服下蟲等藥去血甚多形氣愈虛肢節間各結小核隱于肉裡以為蠶子畏藥而走于外薛云肝藏血而養諸筋此因肝血復損筋涸而攣結耳蓋肢節胸項皆屬肝胆部分養其脾土補金水以滋肝血則筋自舒遂用八珍湯逍遙散歸脾湯加減調治而愈

一產婦小腹作痛有塊脈芤而濇以四物加元胡索紅

花桃仁牛膝木香治之而愈

產後 血崩

薛立齋治一產婦血崩小腹脹痛用破氣行血之劑其崩如涌四肢不收惡寒嘔吐大便頻瀉用六君炮薑四劑稍愈又十全大補三十餘劑全安

一產婦血崩因怒其血如涌仆地口噤目斜手足抽搐此肝經血耗生風用六味丸料一劑諸症悉退但食少晡熱佐以四君柴胡丹皮而愈

孫文垣治黃氏婦產未彌月醉犯房事血來如崩發熱
頭暈大小便俱熱六脈洪大以竹茹蒲黃白芍各一
錢香附茯苓側柏葉各七分甘草炮薑艾葉各三分
血止大半腰猶脹痛下午胸膈飽悶改以川芎五分
當歸茯苓補骨脂蒲黃香附各八分薑炭甘草各一
分陳皮七分人參一錢而愈

呂東莊治從子在公婦半產惡露稀少胸腹脹甚脈之
濡數當重用參芪不然必崩因力艱未服已而果崩

潰不止下血塊如拳如碗者無數神氣昏憤兩足厥冷至小腹兩手厥冷至肩額鼻俱如冰頭上汗如油旋拭旋出按其脈至骨不得見乃投大劑補中益氣

湯加人參一兩未效

如無一兩之參單服補中益氣湯則立脫矣不可不知

急

用人參一兩附子一兩炮薑二錢濃煎灌之至暮漸減戒曰俟其手足溫即停藥至三鼓手足盡溫崩亦止家人忌戒又煎前進之比曉視之脈已出而無倫痰忽上涌點水不能飲入口即吐嘔并獨參湯不能

下曰過劑所致也即投生地黃五錢熟地黃一兩當
歸白芍枸杞各三錢甘草一錢濃煎與飲病者意參
飲尚吐况藥乎不肯服乃強之曰試少飲必不吐進
半甌殊安遂全與之盡藥而痰無半點神氣頓清矣
午后體發熱曰此血虛熱恒理也復用十全大補調
理而痊

張飛疇治陳子厚媳八月間因產不順去血過多產后
惡露稀少服益母湯不行身熱汗出產科用發散行

血更劇自用焦糖酒一碗遂周身絡脈蕞楚難堪惡
露大下昏沉戴眼汗出如浴但言心痛不可名狀

即殺

血心痛也此去血過多心失其養故痛肝主筋為藏血之

地肝失其榮故脈絡蕞楚不堪且汗為產后之大禁
非急用人參恐難挽也用四君合保元湯加白芍五
味一劑汗止因其語言如祟疑為瘀血未盡更欲通
利曰音怯無神此屬鄭聲且腹不疼痛瘀何從有此
神氣散亂不收之故前方入棗仁龍齒諸症悉平后

服獨參湯至彌月而安

薛立齋治一產婦月經不調內熱燥渴服寒涼之劑其血如崩腹痛寒熱作嘔少食用六君子二十餘劑諸病患愈以加味道遙散調理而安

一產婦月經年餘不通內熱晡熱服分氣丸經行不止惡寒作渴食少倦怠胸滿氣塞朝用加味道遙散夕用四君子湯月許諸症悉愈佐以八珍湯兼服兩月而愈

馬元儀治金氏婦產后一月血來不已厥逆自汗不止
或與養血補陰不效診之兩尺空大無神曰褚氏有
云血雖陰類運之者其陽和乎今厥逆自汗脈大無
根為脾腎之真陽內弱故血無所附而溢所謂陽虛
陰必走也法當大補真陽以攝虛陰若養血補陰恐
血未必生而轉傷陽氣則陰血愈不守矣以人參三
兩白朮一兩附子三錢茯苓炙甘草各一錢一劑知二
劑已數劑精神勝常矣

繆仲淳治賀玉伯乃正小產后陰血暴崩作暈惡心牙
齦浮腫喉嚨作痛日夜叫號不絕曰此因失血過多
陰氣暴虧陽無所附火空則發故炎上胸中覺煩熱
所謂上盛下虛之候也法當降氣氣降則火自降矣
火降則氣歸元而上焦不煩熱齒齦腫消喉嚨痛止
陽交于陰而諸病自已耳用蘇子研青蒿子各二錢
半麥冬白芍鱉甲牛膝生地枸杞各四錢五味五分
棗仁五錢續斷橘紅各二錢枇杷葉三片河水煎加

童便一大椀鬱金汁十二匙空心服時進童便一椀
許竹溪夫人年三十餘產後自己至酉血暴下如注呵
欠連連遂目閉口張面色青慘白悴汗出不止髮根
盡濕六脈全無勢欲脫矣其初亦以童便灌之韭醋
熏之殊不應乃用熟地二兩杞子棗仁各一兩令煎
湯候藥至投入不待稠濃即徐徐灌之才盡一鍾汗
止目開口閉漸知人事再與之血止而睡醒後進粥
次日仍以前方令日服一劑四日全瘳當其亟于診

也時方與人會飲擲杯而往疏方而返坐有業醫者
數人詢其症咸曰猶與藥乎用何方曰與某某咸訕
笑曰君真買乾魚放生也咎將隨任余笑而不言

宋申甫室人妊數月時長夏歸寧母家召醫診之以為
經阻也投破瘀辛熱之劑四帖遂半產血行如瀉亟
余診至則大汗淋漓脈將脫矣伏几上去牀數步不
能就寢以血行之猛也時唯親戚朱某在乃屬其母
煮水待藥煎百餘沸即與服再煎再與不及稠濃也

急偕朱就近鋪買熟地四兩杞子棗仁炒各二兩如
法服立瘥

張建東室人年三十餘妊娠五月素有肝病偶不快隣
醫與荊防廣木香砂鬱金元胡之類五劑遂見紅腰
腹痠墜氣促面紅診之脈不接續曰胎已難保第與
滋養二陰以防其崩耳其產必在子夜若待崩而延
診服藥恐緩不及事先疏方與之熟地二兩杞子一
兩棗仁一兩令察其面若加赤氣若加喘血必暴下

宜急飲之至時一一如言果獲無事次日就前方減
半入人參一錢二劑而痊后數年復孕因肝虛發厥
余用生地杞子一劑不敢服遂至變症百出產后上
咳下利余與杞子生地沙參麥冬病少退次日仍前
方告以必薑仁乃可以服參朮薑附既多熱鬱甚非
此莫能解也遂不復邀后聞其日進參朮朮附卒致
不起人之生死豈皆命乎

產後

血迷

張子和治一婦產后第六日血迷用涼膈散二兩四物湯三兩朴硝一兩都作一服大下紫黑水其人至今

肥健

即末句推之則其人素常肥健可知故可用如此藥

柴嶼青治侍御李符千大令媳半產大汗發暈昏不知人

即血迷也

他醫立方俱不敢服符千乃徒步邀視先令

其以韭葉斤許搗爛用好醋炒之乘熱熏鼻少甦用清魂散加童便黃酒服之調理旬日而安

薛立齋治一婦因產后飲酒惡露甚多患血暈口出酒

氣此血得酒熱而妄行虛而作暈也以佛手散加煨
甘葛二錢一劑而痊酒性慄悍入月及產后不宜飲
恐致前症產室人衆氣熱喧嚷亦致此症

梅師治產后餘血不盡上冲心脹悶腹痛以藕汁二升
飲之愈

薛立齋治一產婦患惡露上攻昏憤口禁冷汗不止手
足厥逆用六君子加附子一錢以迴其陽二劑頓甦
又以十全大補湯養其氣血而安

一產婦患前症手不敢近用失笑散一服下瘀血而愈
次日腹痛下利用十全大補而安

一產婦患前症用大黃等藥其血雖下復患頭痛發熱
惡寒次日昏憤自以兩手堅護其腹不得診脈視其
面色青白此脾氣虛寒而痛也用六君子加薑桂而
痛止又用八珍加薑桂調理而安

王執中曰產后血暈寒熱往來或血搶心惡疾也予閱
食療本草見有用鹿角燒為末酒調服日夜數服驗

者偶家有婦人患此令服此神效因教他人婦服皆
驗但以產后未可飲酒以童子小便調服耳最忌服

利藥

資生經

產後

血虛

楊乘六治許氏婦產后動怒寒熱往來脇痛口苦

肝火病其

狀如瘡蓋胆為肝病
肝病則膽亦病矣

漸次發熱晡熱醫用風藥混加

表散腹左忽增一塊匾大如掌日夜作痛或疑寒凝

或疑食滯或疑瘀畜或疑痞積雜治之病益甚食減

肌瘦脈之右關弦洪左關弦數面色黑瘦舌色淡黃而乾症乃怒氣傷肝肝經血少而燥痛也蓋肝居胃左本藏血者也血足則其葉軟而下垂血虧則其葉硬而橫舉內與胃相磨外與肌相逼能不隱而痛乎凡性燥多怒者往往患此而婦女尤多庸妄不知誤用香燥銷剋之劑枉殺者不知凡幾良可歎也以滋水清肝飲四劑塊消痛止繼用歸脾湯去木香加白芍丹皮山梔間服十餘劑而痊

必用歸脾收場吾知其守而未化也

許氏婦產后發熱或時作寒頭痛體倦醫與疎邪降火
煩渴不食楊診之其脈浮取似數重按則芤左手尤
甚唇舌皆白面無血色用十全大補湯加炮薑或曰
如此大熱而用薑桂何也曰陽在外為陰之衛陰在
內為陽之守兩相依附者也今產后陰血大虧虛陽
無附浮散于外而為熱非引浮散之陽歸于柔陰其
熱不退却不盡然故用溫補血氣之劑欲其補以收之也
又曰薑桂味辛而散何云補以收之耶曰桂逢陽藥

固能汗散若逢血藥即為溫行薑之為用生則開肌
發汗熟則溫中散寒至炮黑則入血且能引氣藥以
入血分而生新血故以大補為主以之為佐使陰得
陽生則熱自除耳四劑果熱退身涼十餘劑諸症悉愈
凡產后症多屬陰虛血少第以二地二冬杞子一
切養榮之劑無不立愈若氣血兼補雜以薑附剛
劑非擔延時日即貽病者后患臨症者宜審之

柴嶼青治錢璵沙官侍御時其夫人產后三日惡露甚

少而色白唇燥口乾身熱

與前案唇舌皆白面無血色同

擬用參璵

沙以產后不宜用補為疑柴曰果有外感自別有治法今症屬不足舍此必致貽患不可用參之說此不知醫者及女流之見也遂投人參當歸散加好桂一錢次日口潤生津調理半月而痊

陸祖愚治聶巡司子婦產后百餘日大腸燥結虛火上衝便血腸鳴腹滿短氣內外皆熱半月不能進飲食或與養血清火愈甚診得兩浮洪而數按之無神脾

腎兩脈更覺空虛乃產后元氣耗散真陰不足而非實熱也用八味丸清晨淡鹽湯送三錢用四君加歸芍麥冬知母蓮肉作煎劑數服諸症少緩后以補中益氣加白芍麥冬一月瘳

馬元儀治陸氏婦產未一月因起居微觸便血三日遂徹夜不寐此新產去血過多虛而益虛也凡有所觸必傷其肝肝傷而血溢則氣亦不守矣氣虛血弱心神無養故目為之不瞑又與歸脾大劑用參至一兩

加鹿茸三錢兩月而愈

許竹溪室人產後數日發熱自汗面赤頭痛惡食不眠
惡露雖極少而淡腹時脹痛脈則洪大而數曰此血
虛也腹脹面赤其熱欲崩宜峻補或問故曰面赤者
陽上越也腹脹者陰下陷也陽上飛則陰下走勢所
必然與熟地一兩杞子棗仁各五錢一劑次日小腹
之右忽有塊如槃且硬按之痛甚于是疑為瘀而誤
補欲更張幸病人素服予藥姑再延診曰其塊驟起

即大如槃雖瘀滯亦無如是之甚也此正肝脾失血
燥而怒張得補猶然否則厥而崩矣今脈大漸斂面
赤漸退非藥之誤乃藥之輕也令前方加倍再入炒
白芍五錢炙甘草一錢一服塊漸平再服塊如失前
方減半數劑諸症全安此症若作瘀治斷無幸矣

續名醫類案卷三十四

欽定四庫全書

續名醫類案卷三十五

錢塘魏之琇撰

產後感症

陸肖愚治吳敬之室年二十餘產前已有感冒分娩三日
后因責婢離牀時正冬月覺身上慄慄遂身熱頭痛
或用參蘇飲發其汗頭痛止而身熱不除遂以產
后當大補氣血數劑而煩熱日甚又擬用補中益氣

湯脈之兩手雖弱而左猶帶浮右已見數曰脈虛正產后之平脈但左手猶浮知表邪未散右手見數欲傳裡之候也宜急解其表微通其裡少緩便有承氣之患矣用柴葛桔梗黃芩花粉甘草山查一劑而煩熱減二劑而身涼以清氣養榮湯調之

馬元儀治陸氏婦產后惡寒雖重茵厚被不除屢補不效將行桂附矣診之兩脈沉伏面赤口燥胸滿此非產后新虛乃胎前伏邪也屢用參朮則邪愈結而正

愈阻肌表惡寒者邪熱內鬱逼陰于外也口乾面赤
胸滿者邪氣挾火挾食上凌清道也仍宜一表一裏
治之用葛根防風蘇梗枳殼桔梗杏仁蘇子薄荷一
服而表症矣右關尺轉見滑實隨用大黃五錢元明
粉三錢甘草一錢一服下積穢盛多復發疹發頤此
表裡兩和餘邪畢達之徵也再與辛涼解透之劑而
安此症邪伏于內久而不宜用清陽泄表苦寒達下
兩泄之猶發疹發頤而乃妄行溫補將謂脈伏惡寒

為陽虛之候耶其亦不審病機甚矣

王氏婦產后一月神氣昏倦上氣喘促胸滿中痛咳嗽
發熱百治無效診之兩脈沉潛兼結此胎前已有伏
邪兼產后氣血兩虛邪益內結法宜表裡兩和使邪
從外達氣從內泄病自愈矣以桂枝柴胡蘇梗枳壳
半曲蘗子杏仁廣皮透邪達滯之劑頓安脈已稍舒
或投參地歸芍斂滯之品遂徹夜靡寧如喪神守此
邪結于中補之生變也乃用桂枝炮薑黃連枳實厚

朴廣皮等一劑而胸滿中痛除復用萸仁柴胡桂枝
半夏枳實杏仁蘇子桔梗再劑而表熱喘咳平但大
便不行此久病津液失養也加生首烏一兩便行餘
邪盡去然正氣大虧再與滋補氣血之劑而安

李季虬治魏常正產后飲食不節復感風寒遂致發熱
譫語喘咳氣逆惡露絕不至勢盛急迫謂症皆係外
來客邪尚屬可救設正氣虛脫現諸症者必無幸矣
何以見之以脈氣浮大有力故也用大劑疎風消食

之劑二劑便霍然先是有用白朮芍歸等補藥者幾

為所誤

廣寧記

張意田治一婦產后患病已及半載咸作勞損治且云

陰虧已極勢難痊愈張連診五次確知此症服小柴

胡湯法必當應奈羣議紛紜以參柴非治陰虧之藥

又言肺熱咳嗽大忌人參因立案正心幸病家見信

一服而寒熱大作三服之后寒熱退而咳嗽平十服

全愈 案云診得六脈皆數右寸大而軟關尺兩部

沉候弦急左寸洪數關部三候皆虛數尺中空大
右寸軟大肺氣虛也關尺沉候弦急關主中州尺司
火位沉裏也弦肝脈也此因中氣虛而木邪犯位木
氣動而火從之也左寸洪數心經虛火也關中虛數
肝無血養也尺中空大腎水虛也是脈本屬陰虛而
寒邪乘之留連不已以至于此今所見症五更發熱
者寅卯木旺之時肝木挾邪隨時而動也上午寒熱
得汗熱減者邪稍泄而勢稍緩也咳嗽之聲結而不

暢此久嗽傷肺肺氣虛而邪不得越也胸腹時脹而微鳴此肝木犯脾肝主脹也合脈症是為虛中挾實不得樞轉外出之候也大全曰產后血氣虛弱餘食未平不滿百日將養失所風冷客于氣血顏容憔悴飲食難消感于肺故咳嗽口乾遂覺頭昏百節疼痛榮衛受邪氣通于肝流注臟腑須臾頻發咳嗽無汗寒熱如瘧蓐勞之候往往如此景岳天虛弱之人外邪初感不為解散而作內傷或用清涼或用滋補以

致寒邪鬱伏久留不解而寒熱往來或為咳嗽其症
全似勞損欲辨之者察其表裏病情或身有疼痛而
微汗則熱退無汗則復熱或大聲咳嗽脈雖弦緊而
不甚數即病至一兩月而邪猶未解此似損非損之
症毋再悞也今此症實類此當用小柴胡湯轉動樞
機藉少陽之生氣從內而外自下而上則陰陽和而
伏邪解散矣半夏生當夏半能啓陰氣產后陰虧而
兼口燥故去之胸腹時脹脾陰多鬱宜加牛膝以導

之藥病相當自應如桴鼓也

來天培治潘氏婦季夏產后二十餘日患寒熱便血惡露未淨而專科與香薷飲四劑服后反嘔吐頭眩腹痛自汗惡心發熱氣促發斑色微紅兩頰淡紅診之左脈如絲右脈沉細此虛而兼感嘔吐傷胃肝木乘相火刑金肺氣受傷上下拒格之症也治宜活血滋陰行氣舒脾散滯降逆托裏化斑之劑用牛膝茯苓杞子當歸紅花黃芪川芎木香香附廣皮夏麴生薑

一劑諸症大減六脈和緩但微嗽眩暈心跳胸膈不舒此邪去正虛所致也前方去川芎木香牛膝加伏神丹參杏仁貝母二劑前症盡除惟心跳頭暈改用歸脾湯去人參木香加防黨參杞子白芍調理而愈

產後暑

孫文垣治一婦人年十六初產女艱苦二日偶感暑邪

繼食麪餅時師不察竟以參朮投之即大熱譫語口

渴汗出如洗

暑症多汗

氣喘暑傷氣

泄瀉瀉皆黃水無尿

熱協

下利日夜無度小水短少飲食不進症甚危惡時六月

初旬女科見熱不退乃投黃連黃芩白芍之劑諸症
更甚又以參朮大劑肉果乾薑等止瀉一日計用參
二兩四錢瀉益頻熱益劇喘汗轉加譫語不徹口醫
各束手謝曰汗出如油喘而不休死症也又汗出而
熱不退瀉而熱不止譫語神昏產后脈洪大法皆犯
逆無生路矣惟附子理中湯庶倣幸萬一孫診之六
脈亂而無緒七八至獨右關堅硬

食積

因思暑月汗出

乃常事但暑邪麪食瘀血皆未銷鎔補劑太驟致畜
血如見鬼若消瘀去積解暑猶可生也用益元散六
錢解暑清熱止瀉利水為君糖毬子

即山查

三錢為臣

紅麴澤蘭各一錢五分消瘀安魂為佐橘紅半夏白
茯苓理脾為使三稜五分消前參朮決其壅滯為先
鋒飲下即畧睡謔語竟止連進二劑瀉半減次日仍
用前劑其下熱減大便只二次有黃屎矣惡露行黑
血數枚次日診之脈始有緒神亦收斂進粥一盞前

方去三稜紅麴加扁豆大便一次所下皆黑屎熱盡
退改用六君子加益元散青蒿扁豆香附酒芍炮薑
調而安

易思蘭治石城王福歟之妃癸酉六月受孕偶患泄瀉
醫用淡滲之藥止之自后每月瀉三五日有作脾瀉
者用參苓白朮散之類二三服亦止然每月必瀉五
七次至次年三月生產后連瀉半月日夜八九次諸
藥不效驚惶無措召易診之兩寸尺俱平和惟兩關

洪大有力曰此暑病也以黃連香薷飲治之一劑減
半再劑全愈惟肝脈未退又用通元二八丹調理半
月後平復

陸祖愚治李丹山子室自來元氣不足產后六七日正
當酷暑而卧房在樓忽頭疼氣喘昏悶體若燔炭沉
沉昏去或以為傷寒令門窓盡閉帳幔重圍用二陳
羌防芎蘇一劑口乾唇裂喘急欲絕診之六脈浮洪
而散乃冒暑而非感寒宜涼解而不宜溫散令取井

水洒地鋪以蘆蓆移病人卧其上飲以香薷飲遂微汗而甦再用清暑益氣湯四劑而起

沈明生治劉舜泉孫媳夏月產后暈厥不知人事或謂惡露上攻所致投去瘀清魂等劑瘀不行暈厥益甚又作痰治食治皆不效沈至回翔諦審笑曰吾得之矣此暑熱乘虛而入急宜清暑非黃連不可或謂血得冷則凝今惡露未去若投寒涼是速其斃也沈笑曰有不諱吾任之藥甫入口厥甦暈止再進而惡露

行蓋產時樓小人多炎敲之際益助其熱乍虛之體
觸之豈能不病經云暑傷心又云心主血為熱冒而
暈厥此中暑而非惡露明矣或曰舍症從時理固然
矣然血熱則行冷則凝亦古訓也今用寒涼而惡露
反去何也曰熱行冷瘀以血喻水道其常耳子獨不
觀失血者有用溫暖藥而得止則瘀血者豈無用苦
寒而得行此造化之微權逆從之妙理也安可執乎
產後火熱

易思蘭治一婦產后半月餘胃有清水作逆而吐以為
胃寒令煮雞倍用椒薑初覺相宜

凡內熱虛火之人
初服辛熱之藥亦

有小效至三五日清水愈多以薑椒煎湯時時飲之近

一月口氣漸冷四肢發厥晝夜作逆腹中冷氣難堪

有時戰慄用四物湯人參一錢至二錢初服少安久

則不應又加炮薑亦不效衆議用附子理中湯

庸俗
必趨

道之易診之六脈俱無以食指復按尺部中指無名指

按尺之后

診法
妙

脈來實數有力左右皆同發言壯厲

一句可說三五句唇進頰赤大便五六日一次小便
赤少此實熱症也詢之其俗產后以食胡椒炒雞為
補此婦日食三次半月後遂得此疾乃用三黃湯治
之連進四盞六脈俱現薑椒湯不欲食矣又進四盞
身不戰慄清水減半服四日口中熱氣上升滿口舌
尖俱發黃小粟瘡大便八日不通以四苓合涼膈散
空心一服至午不動又以甘草煎湯調元明粉五錢
熱服一時許腹中微鳴吐出酸水一二碗大便連去

二次又服元明粉五錢下燥矢十數枚後以四苓三
黃山梔枳壳調理全愈

按此為火極似水乃物極必反之候凡患此為燥
熱溫補所殺者多矣哀哉

許學士云記一婦人產後護密閣內更生火睡久及醒
則昏昏如醉不省人事其家驚惶許用荆芥佐以交
加散云服之即睡睡中必以左手搔頭覺必醒矣

本
事

方蓋為
火所逼也

產後火

沈協蘭室人善病自頗知醫最重景岳全書數年來所服多溫補之劑約桂附幾各半斤近以產後惡露淋瀝赤白時下咳嗽日甚小便自遺脈之右寸鼓指兩關弦數右尺弱面有紅光舌當中無胎胸多冷氣喜熱飲稍涼則不快所服乃壽煎加薑桂等乃列案與之曰病本三陰不足久服溫補則氣分偏勝遂致綿延不已其誤在便糖氣冷又喜熱飲認為脾胃虛寒

不知火盛下迫則作瀉上冲則反冷鬱于中則得辛
熱而暫散此理方書多未論及今以產后去血血益
虛則火益盛面有紅光火炎上也惡露赤白肝脾熱
也咳嗽便遺肺虛肝盛腎不秘密也辛溫燥烈宜急
遠之方用生熟地杞子沙參麥冬釵斛初猶畏麥冬之
寒以二錢太重只用六分數劑後覺相宜漸加至一
錢五分十餘劑便不喜熱飲症漸平又加萸仁二十
餘劑每日大便下青黑雜色而辛氣滿房戶蓋桂薑

之熱久泊迴腸因營氣漸充乃勢不能容而下出也
若再投溫補其害可勝言哉書此以為偏服溫補者
戒

楊氏二婦妯娌也其姁新產發寒熱頭暈不能起坐坐
則欲仆惡露紅白兩乳壅腫子戶旁腫如雞卵痛甚
勢將成癰專科與炮薑白朮荊芥桂枝等更嘔惡不
寐脈之弦數六至有餘乃與生地杞子蒂丁麥冬當
歸銀花甘草黃連萸仁六劑全愈其娣產彌月耳聾

頭及乳腹常痛帶下綿綿每浴湯中搖漾如綫子戶
亦腫痛醫與香燥轉甚亦用前方加減而愈又朱朗
齋令妹產後赤白淋瀝口乾咽痛前方去蒂丁當歸
加白芍四帖全安其初楊姒所生兒食乳即吐自母
服藥后亦不嘔矣凡此皆少厥二陰陰虛火盛之病
若謂產后而辛溫是殺之也

產後

惡寒

吳洋治汪伯玉孀杜冬舉仲子會病瘡且痿四肢汗溢

而甚惡寒歷春夏滋深挾纒擁絮猶慄慄曰物極則反吾且極之病由遞產而虛勢重不可亟反激而后反其易為力哉于是補以參芪斂以桂枝固以龍骨牡蠣經年寒猶故也汪以為言洋曰母謂徐徐及瓜而后可治又明年夏先期一月而診之曰藥力告盈其可已至日則以槃水沃青巾者二以石水浮瓜者三謂汪曰洋無戲言通言語徹衣衾其在今日乃命女僕奉槃水進杜難之手語曰吾病產后宜不可水

洋曰無害第以兩手按青巾試之病者曰宜然后乃沃兩履尋漱以盂水已復飲之既削瓜而華啖其半于是汗止聲出單衣如常先是溪南吳千婦病與杜

同洋治以嚮法效

太函集

產後喘

樓全善治一婦產后洗浴即氣喘但坐不得卧已五日惡風得暖稍寬兩關脈動尺寸俱虛百藥不效用牡丹皮桃仁桂枝茯苓乾薑枳朴桑白皮紫蘇五味子

萸仁服之即寬二三服即卧其痰如失蓋作汗血感

寒治之也

治法
景

薛立齋治一產婦喘促自汗手足俱冷常以手護腹此陽氣虛脫也用人參附子湯四劑愈

繆仲淳曰己丑子婦產后五日食冷物怒傷脾作瀉乃微嗽又三日泄不止手足冷發喘牀亦動搖神飛揚不守一醫投以人參五錢附子五錢療之如故加參附又不效漸加參至三兩附子三錢一劑霍然起

廣筆
記

繆仲淳治于中甫夫人產后氣喘投以人參五錢蘇木

麥冬各三錢一劑愈

未入選

產後咳嗽

薛立齋治一婦咳嗽見風則喘急惡寒頭疼自汗口禁
痰盛薛謂脾胃氣虛腠理不密用補中益氣加肉桂
數劑而安

一產婦咳而腹滿不食涕唾面腫氣逆此病在胃而關
于肺用異功散而愈

孫文垣治贊皇令堂產后左脇痛盛

此脇痛緣肺實咳而氣機不利

嗽痰不易出內熱氣壅不能伏枕與以瓜蒌仁六錢桑白皮蘇子杏仁半夏桔梗枳殼各一錢水煎服之氣定喘除外與保和丸及七製化痰丸而安

繆仲淳治施靈修乃正產后發寒熱咳嗽不止因本元

虛弱誤用薑桂勢甚劇

二句宜細玩之

用鱉甲白芍牛膝生

地各四錢山查麥冬益母草各五錢橘當歸各二錢青蒿杜仲各二錢五分棗仁八錢遠志五味各一錢

茯苓神三錢竹葉三十片數劑輒定

方亦太雜

聶久吾治一婦年四十餘因產過多身熱日夜不止午
后益盛肌內瘦削經水不行諸醫無效與花粉山藥
百合香附麥冬各八錢天冬五分地骨皮當歸二母
各六分生地生炒各四分白芍生炒三分前胡四分
茯苓七分生甘草三分薑一薄片龍眼三個服十餘
劑而身熱已退又加桔梗四分酒炒苓連各六分二
十餘劑而安

產後嘔

附霍亂

陳霞山治一婦產後傷食致胃虛不納穀四十餘日聞穀氣藥氣俱嘔以參苓白朮炒麴各一錢陳皮藿香各五分炙甘草三分砂仁五分陳米一合用沸湯二椀泡伏龍肝末澄清汁煎藥服而安

薛立齋治一產婦患腹脹滿悶嘔吐因敗血散于脾胃

不能運化所致或用抵當湯

疑是抵聖湯

敗血以下前症

益甚小腹重墜似欲去后薛謂脾氣虛而下陷用補

中益氣湯加炮薑溫補脾氣重墜如失又用六君子湯而安

一產婦停食霍亂用霍香正氣散之類已愈後胸腹膨脹飲食稍過即嘔吐或作泄瀉此脾胃俱虛用六君子湯加木香治之漸愈后因飲食失調兼恚怒患霍亂胸腹大痛手足逆冷用附子散又用八味丸以補土母而康設泥痛無補法而用辛散或用平補之劑必致不起

產後泄瀉

陸養愚治臧舜田內人脾胃素常不實產后因怒大便秘瀉或以胃苓湯加歸芍投之勢日甚且汗出氣喘脈氣散大或謂此非產後泄瀉所宜宜勿藥陸曰脈雖大而按之不甚空尚有一二分生意用人參理中湯加訶子肉果已煎矣忽傳人事已不省再診之浮按虛數沉按如絲手足厥逆或謂今夜決不能延乃辭去陸令急以前藥加附子一錢一劑汗止瀉減再

劑病減七分去附子加歸芍數劑起

王愴如治一產婦瀉彌年不愈六脈沉遲此元氣下陷寒熱太甚症也然湯藥猶濕也以濕治濕可乎遂用參芪苓朮肉蔻升麻防風甘草用猪肚一枚入蓮肉一斤好酒煮爛搗和為丸日進而安

陳三農治一婦產后滑瀉勺水粒米不容即時瀉下半月餘矣六脈濡而弱此產勞力傷脾也若用湯藥恐滋胃濕遂以參苓白朮散加肉蔻生薑棗肉為丸服

愈

薛立齋治一產婦大便不實飲食少思五更或清晨遺尿此中氣虛寒脾腎不足用補中益氣送四神丸而痊

張子和治李德卿妻因產后病泄年餘四肢瘦乏皆斷為死症張曰兩手脈皆微小乃利病之生脈況洞泄屬肝經肝木剋土而成此病亦是腸澼澼者腸中有積水也先以舟車丸四十五粒又以無憂散三四錢

下四五行又進導飲九渴則調以五苓散再與胃風湯調之半月而能行一月而安健

產後

不禁

薛立齋治一產婦小便頻數時忽寒戰乃屬脾肺虛弱用補中益氣加山茱山藥為主佐以桑螵蛸散而愈後患發熱晡熱盜汗自汗月水不調用加味道遙散而安

一產婦患前症吐痰發熱日晡作渴此膀胱陰虛用補

中益氣湯佐以六味丸而愈又患痢后小便頻數手足俱冷屬陽氣虛寒用前湯及八味丸而瘳

一產婦小便不禁二年不愈面色或青赤或黃白此肝脾氣血虛熱用加味逍遙散為主漸愈佐以六味丸而痊后因怒小便自遺大便不實左目頓緊面色頓赤仍用前散佐六君子湯以清肝火生肝血培脾土而瘳

一產婦小水淋瀝或時自出用分利降火之劑二年不

愈以為肺腎氣虛用補中益氣及六味丸而痊

產後祕結

附淋

薛立齋治一產婦大便秘結小腹脹痛用大黃等藥致吐瀉不食腹痛胸痞用六君子湯加木香炮薑治之而愈

孫文垣治沈三石夫人產三日腹不暢女科為下之大瀉五六次遂發熱惡心又用溫膽湯止吐小柴胡退熱數劑食吐不止粒米不進又用八珍湯加童便昏

憤耳聾眼合口渴腸鳴

發熱惡心耳聾口渴多似感症然此實誤下虛之所致所

謂變症蜂起也

眼胞上下及手足背皆浮腫診之六脈皆數

曰脈數所主其邪為熱其症為虛與十全大補湯加
炮薑夜半稍清爽進粥一盂始開目語言次日午以
藥不接且言語過多復昏昧不知人事翌日以人參
白朮各三錢炮薑茯苓陳皮各一錢甘草五分服訖
體微汗遍身痲痺熱退神爽下午藥又不接且動怒
昏昧如前六脈散亂無倫狀如解索痲痺亦沒亟以

人參白朮各五錢炙甘草炮薑製附各一錢連進二

帖是夜熟睡唯呼吸之氣尚促

屢進皆效後之腫毒自非實症也

次

日脈轉數下午發熱不退環跳穴邊發一毒如碗大
紅腫微痛女科復譖曰向之發熱惡心皆此所致薑
附溫補誤也須急進寒涼解毒之藥孫曰此乃胃中
虛火遊行無製大虛之症非毒也若用寒涼速其死
耳經云壯者氣行則愈怯者著而或痛惟大補庶可
萬全三石然之仍與前劑日夕二帖參朮皆用七錢

服后痢症復起毒散無踪熱亦退再以參苓白朮散
調理而安是症皆由誤下致變百出可不慎哉

按是症多由產后血津虛耗及平素多火內熱之
人常有之雖日數過亦無所害即欲通之唯大劑
二冬二地歸杞菴蓉不過一二服即行矣彼桃杏
麻栢及膽蜜之治猶下乘也若硝黃肆用誠失醫
哉

薛立齋治一婦產后大小便不通諸藥不應將危矣令

飲牛乳一日稍通三日而痊人乳尤善

產後瘧

陸肖愚治陳振宇女年二十七產后患間日瘧已月餘
寒熱雖不甚而身體倦怠飲食減少脈之左手平和
右手弱而無力與補中益氣湯二劑覺胸膈飽悶遂
歸咎人參更醫仍用青皮飲二陳湯等寒熱反甚用
截藥或止數日復作延至數月肉削骨立再診之其
脈微弱已甚曰前服人參兩可愈今非至斤不能奏

效矣用十全大補湯二劑仍覺悶疑之曰直服至不飽悶自愈矣更倍參投之遂飲食日增服數十劑方起

產後下痢

薛立齋治一產婦食雞子腹中作痛面色青黃服平胃二陳更下痢腹脹用流氣飲子又小腹一塊不時上攻飲食愈少此脾胃虛寒肝木尅侮所致用補中益氣加木香吳茱萸漸愈又用八珍大補兼服調理而

安

龔子才治一產婦血痢小便不通臍腹疼痛以生馬齒
莧搗爛取汁三大合煎沸下蜜一合調頓服即愈

薛立齋治一產婦尿后下血諸藥不應飲食少思肢體
倦怠此中氣虛弱用補中益氣湯加吳茱萸炒黃連
五分四劑頓止但怔忡少寐盜汗用歸脾湯治之而
愈

孫文垣治族女小產后二十日矣患赤痢一日十餘次

怯寒惡食小腹脹痛診之右寸滑大知其虛中有熱
蓋緣惡露未盡故小腹脹痛專科泥丹溪產后大補
氣血之語概施之因而作痢乃翁曰病尚怯寒何云
有熱曰惡寒非寒反是熱症蓋火極似水也時師多
味此音
飲藥后當知之以白芍當歸滑石為君桃仁酒連酒
苓為臣木香桂皮檳榔為佐青皮為使服下果去黑
瘀血甚多小腹頓寬惟口乾小水少惡心怕飲食體
倦仍裡急后重人參川芎白芍各一錢當歸一錢五

分酒連陳皮各六分木香二分外與清六丸服下熱除痢減十之八矣但大便不實惡心虛弱以四君子湯加酒芍陳皮木香肉果酒連當歸養之而平

陸養愚治李尚田乃正產後患痢延及年餘肢肌羸瘦面色鰲黑咸以不可為矣脈之兩手皆微小而右關尺之間尚覺有力如珠舌中常起黑胎曰微小乃久痢生脈脈滑胎黑必沉積在腸久而未去也若大下之病當愈李謂初病亦常服通利今飲食不進者數

月矣安所得積乎因前方大都紐于產后大補氣血
為主即用消導多襍參芪歸芍補不成補消不成消
致元氣日衰積滯日固至收斂濕瀦宜其劇也乃
以潤字九一兩分三服令一日夜服盡下紫黑如膏
數缶許口渴甚煎生脈散作茶飲之胃漸開又以潤
字日服一錢每日下稠積缶許十日后方用補養一
月而痊

張路玉診大兵船上一婦胎前下痢產后三日不止惡

露不行發熱喘脹法在不救服藥一劑反加呃逆診之其脈三至一代欲辭不治因前醫被留不與排解必致大傷體面乃曰此症雖危尚有一綫生機必從長計議庶可圖治彼聞言始放其醫而求藥遂與蠶一枚錢數文令買砂糖熬枯白湯調服既可治痢又能下痢且不傷元氣急與之服彼欣然而去醫得脫而遁至大兵去乃歸

薛立齋治一產婦痢未至滿月因食冷物及酒冷熱與

血攻擊滯下純血纏墜極痛其脈大無力口乾用黃

芩芍藥湯三服而安

未選入

痘 孕產婦

徐仲光曰一孕婦正痘養漿時墮胎血去多昏憤乃伏陷而死

一孕婦症同前以黃芪一兩五錢人參當歸各一兩阿膠五錢甘草艾黑薑各三錢附子一錢治之而愈

一婦漿期正產痘順以保元湯加川芎當歸荆芥山查

益母草而愈

一孕婦痘漿足不易痂面赤晡熱此脾虛血少也以安胎飲加參而愈

一孕婦痘勻朗灰白熱甚墮胎昏憤冷嘔此胃氣虛寒也以保元湯加炮薑白朮肉桂而愈

一產婦痘不易透疲倦血去不止此氣血兩虧也治以芎歸參薑益母升麻血止痘起又以補中益氣而愈
一孕婦出痘以安胎飲調理而愈又有胎痛甚者以砂

仁炒黑研末酒下一錢即愈

一產婦出痘漿不足灰白身熱肢冷寒戰咬牙煩躁溲泄此脾胃氣虛也以異功散治之而愈亦有去血不止藥不效者倒靨而死

一婦產后痘順痰盛清解之益甚此陰虛不能致陽也以六味地黃丸料加當歸麥冬而愈

一婦痘甫愈而強以房事疤變色成勞而死

一產婦痘不易發煩躁譫狂此毒重壅遏也以芎歸連

紫升莠甘芍蟬退治之而愈

萬密齋治程氏女年二十出痘時娠五月矣診其脈男胎也惟以清熱解毒和中安胎為主用黃芩白朮為君人參生甘草當歸生地白芍紫蘇為佐自初出至成漿無他苦乃聞家中被盜遄歸醫與藥一服胎墮果男也再延診痘變灰白平塌成倒陷乃裏虛故也詢所用方乃獨聖散曰山甲麝香皆墮胎藥去氣血益虛瘡毒內陷不可為矣三日卒



--	--	--	--	--	--	--	--

續名醫類案卷三十五